

Ikalaata iya Paulo ku

Bhafiliipi

Uwandilo

Inhaaya iya Filiipi yáamile mu Makedoniya, kumbaligamba mu nsi iya Wugiliiki. UPaulo áumbiliye kukuula (Mbombo zya Bhasundikwa 16) na kwanda ishibanza. Heelo we gaashila amanha, uPaulo ákunguilwe mwi jeela. Ishibanza isha mu Filiipi shámutwaliiye inhela. Ásimbile ikalaata ili kubhasalifwa kunongwa iya kumutwalila.

Khabhili mwi kalaata ili akubhabhuuzya abhakilisiti kuti atakusaajila kufwa. Akubhagomwa kwimilila ku makha mu lwikho inga bhakubhayimvwa. Akubhakumbusya kuti uwuumi waabho mwa Kilisiti shikunjilwa she uMulungu abhapiye.

Zye zili mu shitaabu ishi
UPaulo akubhalamukha abhafiliipi
Akubhabhuuzya intumi na mayimba ge áamile nago
Akubhabhuuzya kulekha imbombo iyi njendo izyi maandi, bhamwar
UPaulo akubhasalifwa vwe bhámupiiye

Indamukho

¹ Ine ne Paulo peeka nu nholo wiitu mu lwikho uTiimoti, tubhabhombi bha Yeesu Kilisiti. Tukubhasimbila mubhafinjile* mwenti mwe mupatinhiine nu Yeesu Kilisiti, mwe muli mu nhaaya iya mu Filiipi, peeka na

* 1:1 1:1 Mubhafinjile Bhaazya abhafinjile mu Wilulanyo uwa mazwi amajeni.

bhimiilili na bhaavwi abha shibhanza. ² Utaata wiitu uMulungu nu Mwene uYeesu Kilisiti bhabhalolelaje uwiila, na kubhapa uwutengaanu.

Upaulo akubhapuutila aBhakilisiti abha mu Filiipi

³ Inkumusalifwa uMulungu waani kunongwa yiinyu akhabhalilo khonti khe nabhakumbukha. ⁴ Akhabhalilo khokhonti khe inkubhalaabhila imwe mweni kwa Mulungu, inkupuuta ku luseshelo. ⁵ Kwandila isiku lye mwitishile, mukunaavwa we inkulumbiilila iNtumi iNyinza izya Yeesu Kilisiti kufuma isiku iya kwanda kufishila akhabhalilo ikha. ⁶ Imanyile nalyoli kuti, uMulungu we ayandile imbombo inyinza iya wuposhi mukaasi yiinyu, atijendeelele kuyikwilizya kufishila pi siku liila lye uYeesu Kilisiti akhayigalukha. ⁷ Yikhondeeye kukwani kubhasibhiilila shiniisho imwe mweni, kunongwa ye imbaganile nhaani. Ye nongwa ku khabhalilo ikha khe inkungiilwe na khabhalilo akha palusalo khe intakungiilwe, imwe mweni munavwizye kuvwinsya na kwimila iNtumi iNyinza mu wiila wa Mulungu we ambishiye kulolesya uwanalyoli. ⁸ UMulungu we azimanyile ziniizi zye inkulonga kuti nalyoli insambile nhaani kubhalola winza imwe mweni, kunongwa ye imbaganile anza she uYeesu Kilisiti abhaganile.

⁹ Inkulaabha kwa Mulungu kuti ulugano lwinyu ujendeelele kwonjela nhaani, peeka na kubha ni njeele nu wumanyi uwa nalyoli, ¹⁰ inga muzimanye na kubhomba zye nyinza nhaani. Ipo pe mutibhe ni njendo inyinza sita mbiibhi naazimo kufishila isiku liila lye uYeesu Kilisiti akhayigalukha winza. ¹¹ UYeesu Kilisiti wuuyo we atibhavwaje kujendeelela kubhabhombela abhanji izya wugolosu, inga uMulungu ayimishilwaje na kupaalwa.

Uwinza wa mayimba aga kukungwa uPaulo

¹² Ishi bhanholo bhaani mu lwitikho, inkwanza mumanye kuti amayimba iga aga kukungwa, gavwizye nhaani kuvwinsya iNtumi iNyinza. ¹³ Kufumilana na ganaago, abhalindiilili bhonti abhi nyumba iya wumwene uwa Shiluumi peeka na bhantu abhanji bhonti abha panaapa, bhamanyile kuti inkungiilwe kunongwa iya kulumbiilila izya Kilisiti. ¹⁴ Khabhili kukungwa kwani kunuuku, kubhavwizye abhanholo mu lwitikho abhinji kubha bhadandamazu mwa Mwene uYeesu. Abheene bhakwonjela nhaani kulumbiilila intumi zya Mulungu sita lyoga. ¹⁵ Bhaliipo abhamwabho bhe bhakulumbiilila intumi zya Kilisiti kunongwa ye bhakundolela umwone, khabhili bhakwanza kufuuyana niine. Ileelo bhamu bhakulumbiilila intumi zya Kilisiti ku nsibho inyinza. ¹⁶ Ibha bhakumulumbiilila ku lugano, kunongwa ye bhamanyile kuti uMulungu ampaiye imbombo iya kwimila iNtumi iNyinza. ¹⁷ Ileelo abhamwabho bhakulumbiilila intumi zya Kilisiti kwi dala ilya kuyibaada, te ku mwoyo uwa wugolosu. Bhakusiibha kuti kubhomba shiniisho bhatinonjezye amayimba mu wukungwe waani.

¹⁸ Liniilyo litakunanganya naakhamu! Ine inkuseshela inga abhantu bhakumulumbiilila uKilisiti ku madala aminji, yibhe ku nkwinno imbiibhi awe ku nkwinno inyinza. Khabhili intijendeelele kuseshela nhaani, ¹⁹ kunongwa ye imanyile kuti, ku ziniizyo zye zinaajile, intituuwe ku mpuuto zyinyu na ku makha ga Mupepu wa Yeesu Kilisiti. ²⁰ Inkwinno yaani impiti, nu lusuuubhilo lwani ku kuti kwi dala lyolyonti, te insuupile kumusuuubhila uKilisiti, lyoli intijendeelele kubha nu mwoyo uwa wudandamazu mu tubhalilo twonti, inhaani mu khabhalilo ikha. Inkubhomba shiniishi inga mu wiikhalo

waani wonti, we ne mwumi awe inga naafwa, uKilisiti apalwaje. ²¹ Ishi kukwani, kubha ne mwumi ku kanongwa iya kumabhombela uKilisiti, na kufwa kwe kwiza nhaani. ²² Ileelo inga inkujendelela kubha ne mwumi, intilole inyinza zye zikufumilana ni mbombo yaani. Intakumanya lye lyanza nhaani. ²³ Pe indi panaapa, indemiilwe na gabhili. Inkusungukha kufwa inga imbale kwikhala peeka nu Kilisiti. Liniili lye lyanza nhaani. ²⁴ Ileelo ilyinza nhaani kukwinyu li liili iya kuti injendelele kubha ne mwumi. ²⁵ Kanongwa ye ine inkusubhila ziniizi, imanyile kuti intijendelele kubha ne mwumi. Inhayibha peeka niimwe mwenti, inga mugome na kubha nu luseshelo mu lwitikho. ²⁶ Khabhili mutijendelele kubha ni togo kwi dala iya kupatinhana nu Yeesu Kilisiti, kanongwa ya kwiza kwani kukwinyu kubha peeka niimwe winza.

²⁷ Lye likwanziwa nhaani ku kuti, injendo zyinyu zikholanaje ni manyizyo zyi Ntumi iNyanza izya Yeesu Kilisiti. Inga nianza kukwinyu awe inga napootwa kwiza, inhimvwaje kuti muyisindile akhinza mu nsiibho yeeka nu mwoyo weeka kulwila ulwitikho lwe lukufumilana ni Ntumi iNyanza. ²⁸ Khabhili mutabhogopaje abhalugu bhiinyu, lyoli mubhanje mwe bhadandamazu insiku zyonti. Liniili lye shiholesyo isha kusimishizya kuti uMulungu akhayibhayazya. Ileelo kukwinyu imwe shiholesyo sha wuposhi we wukufuma kwa Mulungu. ²⁹ Inkulonga shiniishi kanongwa ye uMulungu abhapiiye imwe uwiila, te kumwitikha uKilisiti kwene, lyoli na kuyimba kanongwa ye mumwitishile. ³⁰ Mwálolile palusaló she náyimbile, akhabhalilo ikha mukujendelela kwimvwa amayimba gaani. Ishi niimwe mukuyimba anza shiisho.

2

Uwutimvu nu wupiti wa Kilisiti

¹ Uwiikhalo wiinyu mwa Kilisiti wukubhapa amakha, nu lugano lwakwe lukubhainjizya. Muli nu wupeeka mwa Mupepu uMufinjile, mukulolelana ishisa na kubha nu wutonsu. ² Ishi mukwilizyaje uluseshelo lwani, kwi dala ilya kubha nu lwimvwano, ulugano, umwoyo weeka, ni nsibho yeeka.

³ Mutabhombaje naalimo ku mwoyo uwa wulumanyi awe ku mabaado. Mubhanje nu wushindamu muneemwe na muneemwe, weeka weeka amwenyaaje uwamwabho kuti akhondeeye kushila uweene wuuyo.

⁴ Umuntu wowonti aleshe kusaajila zyi zyakwe, lyoli ayanzaje kwavwa abhanji. ⁵ Mubhanje ni nsibho yiniyo ye amile nayo uYeesu Kilisiti.

⁶ She poope uweene amile wu Mulungu, atakhalola kuti kubha wu Mulungu, khantu kha kulemelela ku makha.

⁷ Lyoli ku shigane shaakwe wuuyo, akhawulekha uwumwamu waakwe, akhayibhikha ngati atali nu wumwamu naawumo. Akhabha mutumwa, akhapaapwa anza bhantu abhanji.

⁸ Akhayiisya na kutinikha, poope akhafwa uwufwe uwa pa shikhobhenhanyo.*

⁹ Kunongwa yiniyo, uMulungu akhamuzvwa nhaani, akhaamupa itaawa ipiti kushila amataawa gonti.

¹⁰ UMulungu abhombile shiniho, inga uYeesu abhe nu lushindikho.

* 2:8 2:8 Uwufwe uwa pa shikhobhenhanyo Ku Bhayahu-udi na ku Bhaluumi uwufwe uwa pa shikhobhenhanyo wamile wa bhantu bhe bhabhombile imbiibhi nhaani.

Khabhili ivipelwa vwonti ivwa kumwanya kwa Mulungu,

ivwa mu nsi ni vwa kwilongo,†
visugamile pilongolela yaakwe kumupuuta.

¹¹ Khabhili umuntu weeka weeka
ayitische pa mbimbili kuti,
uYeesu Kilisiti wu Mwene,
ku wumwamu wa Taata uMulungu.

Inhozyo izyi nsi zyonti

¹² Ishi bhaganwa bhaani, we naamile peeka niimwe, mwálolesiize ulutinikho lwinyu kukwani. Akhabhalilo ikha khe indi ukutali niimwe, mujendeelele kubha nu lutinikho. Mubhombaje zye zikhondeeye kubhombwa na bhantu bhe uMulungu abhaposhile. Mubhombaje shiniisho ku lyoga na khantentemwi. ¹³ Kunongwa ye uMulungu wuuyo akubhomba imbombo mukaasi yiinyu, na kubhapa amakha aga kugana na kubhomba zye akusiibha wuuyo.

¹⁴ Mubhombaje zyonti sita kuyibhuna na sita madali,
¹⁵ inga mubhe mwe bhantu mwe mutali ni mbiibhi naazimo. Mubhanje mwe bhaana abhagolosu abha Mulungu bhe bhakwikhala mu nsi iya bhantu abhabhiibhi bhe bhateejile. We mukwikhala mu nsi, imwe mwe lukhozyo ku bhantu bhanaabho ku njendo inyinza anzi nzota she zikulamwa ku mabhingo. ¹⁶ Mulemaje izwi lya wuumi. Ipo pe niine intilyaje idala ilya kuyibaadila pi siku liila lye uKilisiti akhayigalukha, kunongwa ye yikhayilolekha apazelu kuti kuyikungula kwani ni mbombo yaani kutateejile pabhuulo.

¹⁷ Kwi dala ilya kumwitikha uKilisiti, imwe mwáy-ifumwizye ngati mfinjile kwa Mulungu. Pe shiniisho

† 2:10 2:10 Kwilongo Bhaazy mu Wilulanyo uwa mazwi amajeni.

niine inga bhangoga kubha ngati mfinjile kunongwa ya Kilisiti, intiseshele na kushimwa peeka niimwe. ¹⁸ Niimwe shiniisho mukwanziwa kuti museshelaje, na kushimwa peeka niine.

UPaulo akubhasonteelezya uTiimoti nu Epapuladito

¹⁹ Inga uMwene uYeesu ayigana, inkusubhila kumusonteelezya uTiimoti kukwinyu shiniishi bhulo, inga niine injinjile umwoyo, we nimvwa she mukujendelela. ²⁰ Kunongwa ye intali nu muntu uwunji we akubhasaajila anza weene. ²¹ Abhanji bhonti bhakwanza kubhomba imbombo zyabho bhiihho bheene, sita kubhomba zye uYeesu Kilisiti akwanza. ²² Imwe muneemwe mumanyile uwudandamazu ni njendo inyinza izya Tiimoti, kuti abhombile imbombo iya kulumbiilila iNtumi iNyinza peeka niine, anza mwana we akubhomba imbombo nu yise waakwe. ²³ Ishi inkusubhila kumusonteelezya kukwinyu nalubhilo, we naamanya zye zitinaaje kufumilana na kukungwa kwani. ²⁴ Niine inkumusubhila uMwene uYeesu kuti, nuneene intiyanze kubhayaatila shiniishi bhulo.

²⁵ Ileo inkulola yikwanziwa kumusonteelezya uEpapuladito kukwinyu, uwamwita we akubhomba imbombo peeka niine, umusikaali mu lwitikho peeka niine. Khabhili mwamusonteleziizye kukwani, inga anaavwe vwe imbulililwe. ²⁶ Wope asabile nhaani kubhalola imwe mwenti, azyugunhiine nhaani kunongwa ye mwimvwizye kuti aabhinile. ²⁷ Nalyoli aabhinile nhaani, aapululiiye kufwa. Ileo umulungu anza amulolela ishisa, te wuuyo mwene khaala, lyoli niine bhulo aandoleeye ishisa, inga intazyugunhane nhaani. ²⁸ Ishi injikunguuye nhaani kumusonteelezya kukwinyu nalubhilo, inga we

mwamulola, mukhashele winza, nu wuzyugunhanu waani weepe. ²⁹ Mumuposheelee kwi taawa lya Mwene uYeesu ku luseshelo lwonti. Mukwanziwa kubhashindikha abhantu bhe bhali anza wununu. ³⁰ Uweene apalamiye kufwa kunongwa iya kubhomba imbombo ya Kilisiti. Ayilinganyiye kufwa inga ayinze kunaavwa ivintu vwe mwapotilwe kwinda kumpa mneemwe.

3

Injendo izya wusunde uwa nalyoli

¹ Ishi bhanholo bhaani mu lwitikho, inkubhabhuzya kuti, maseshelaje kubha peeka nu Mwene uYeesu. Intakulita kugalushila kubhasimbila amazwi gagaala ge nabhasimbiiye palusalo, kunongwa ye ganaago gatiyonjezye kulindiilila ulwitikho lwinyu.

² Mubhe amiiso na bhabhomba mbiibhi, bhe bhali ngati mbwa, bhe bhakusundiilila kulema aminho aga kuti kawaaga uwuposhi yikuti utahiiliwe.* ³ Itwe twe bhantu bha Mulungu twe tutahiliilwe iya nalyoli, abheene khaala. Inkulonga shiniisho kunongwa ye itwe tukumupuuta uMulungu kwi dala iya Mupepu waakwe na kulola itogo kunongwa ye tupatinhiine nu Yeesu Kilisiti. Itwe tutakubhiikha ulusubhilo lwitu mu vintu ivwa mu nsi kuti vingatupokha. ⁴ Ileelo niine bhulo naamile ingasubhila ziniizyo izya mu nsi.

Inga aliipo umuntu we akusibha kuti angakhola kusubhila ziniizyo izya mu nsi, ine imushilile. ⁵ Ine natahiliilwe we indi ni nsiku naane kufuma kupaapwa kwani. Ine ne Mwisilaeli uwa mu shikholo sha

* 3:2 3:2 Utahiiliwe Kutahiiliwa yamile shilolesyo mu mubhili kulolesya ulufingo lwa Mulungu na bhantu bhaakwe. Bhaazyu kutahiili mu Wilulanyo uwa mazwi amajeni.

Benjamiini, Muebulaniya **u**wa **k**upaapwa. **K**u zya **k**ulema indajizyo zya Bhayahuudi, ine náamile ne Mufalisaayi.† ⁶ Khabhili inhayifumwaga nhaani **k**uyimvwa ishíghanza.‡ **K**u zya wugolosu we wukufumilana na **k**ulandata indajizyo, náamile ne mugolosu, sita nongwa naayimo.

⁷ Heelo zyonti zye inhazilolaga **k**uti zikunaavwa, ishi inkuzilola **k**uti zitakunaavwa naakhamu, **k**unongwa iya **k**umwitikha uKilisiti. ⁸ Nalyoli te ziniizyo nyene khaala, lyoli inkuzilola zyonti **k**uti zitakwavwa naakhamu, **k**unongwa ya winza **u**wa **k**umumanya nhaani uYeesu Kilisiti, **u**Mwene waani. **K**unongwa ya Yeesu **w**anuuayo, initishile **k**uvilekha vwonti. Inkuvilola vwonti viniivwo ngati mavi inga imumanye akhinza uKilisiti. ⁹ Naani indoleshe pilongolela yaakwe, inga intayibhiikhaje nuneene **k**uti inhondeeye pamiiso ga **M**ulungu kwi dala ilya **k**ulema indajizyo. Lyoli inkukhondela pamiiso ga **M**ulungu kwi dala ilya **k**umwitikha uKilisiti, **k**ukhondela kwe kukufuma kwa **M**ulungu, kwe kukufumilana **n**u lwitikho. ¹⁰ Akhantu khe inkwanza, **k**u **k**umumanya uKilisiti, **k**ulola amakha aga **k**uzyukha kwakwe, **k**uyimba anza she **u**weene ayimbile, na kufwa kwani **k**ukholane na kufwa kwakwe. ¹¹ Kumo inkusubhila **k**uti niine we naafwa, **u**Mulungu akhanzyusye.

Kujimbiilila inga tufishile uwugolosu

† 3:5 3:5 UMufalisaayi Bhaazya aBhafalisaayi mu Wilulanyo **u**wa mazwi amajeni. ‡ 3:6 3:6 Inhayifumwaga nhaani **k**uyimvwa ishíghanza UPaulo we ashili **k**upindukha, akhasiibhaga **k**uti we akubhayimvwa aBhakilisiti akubhomba mbombo ya **M**ulungu. Bhaazya Mbombo zya Bhasundikwa 8:1-3; 9:1-2; 22:4; 26:9-11.

¹² Intakuyibaada kuti imfishile, awe kuti nabha ne mugolosu, ndaali. Lyoli ine uKilisiti ansabhuuye, ye nongwa inkuyikungula kumulandata inga imfishile kuposheela insupo ye kunongwa ya yiniyo uYeesu Kilisiti anaajile. ¹³ Bhanholo bhaani mu lwitikho, intakuyibhaazya kuti imfishile, lyoli inkubhomba lyeka lyene, inkuzilekha zye zishilile kulusalu, inkushimbilila zye zili kwilongolela yaani. ¹⁴ Inhambiiye kujenda inga imfishile kumpelelela, imposheele ishipambwi she umulungu atubhilishiiye kubhala kumwanya kwi dala ilya Yeesu Kilisiti. ¹⁵ Itwe twe tukulile mu lwitikho, tulisibhililaje liniilyo. Poope inga mukusiibha ishinji ku lyolyonti, umulungu atibhasakulile liniilyo apazelu. ¹⁶ Ileo ilyinza nhaani ku kuti tujendeelele kulemeelela liila lye tulifishiiye.

¹⁷ Bhanholo bhaani mu lwitikho, mulandataje ishifwani shi njendo zyani inyinza na kumanyila ku bhaala bhe bhakulandata ishifwani shi njendo zye twabhalanjile. ¹⁸ Ine imbabhuziizye ziniizi akhinji bhulo. Ishi inkugalushila winza ku mansozi, kubhabhuuzya kuti bhaliipo abhantu abhinji bhe bhakulolesya ku njendo zyaabho kuti bhalugu bha shikhobhenhanyo sha Yeesu Kilisiti. ¹⁹ Uwumalilishilo wa bhantu bhanaabho ku kuyaga, umulungu waabho ku kwikusya inyanda zyaabho. Bhakulola itogo kubhomba izyi nsoni, kabhili bhakusiibha vwi vintu iwva mu nsi. ²⁰ Ileo itwe twe bhakhaaya bha kumwanya, tukumugulila nhaani uMuposhi wiitu, umwene uYeesu Kilisiti, ayinze kufuma kumwanya. ²¹ Uweene akhayigalulanya amabhili giitu iga aga wudeganu, na kugabhiikha kuti gakholane nu mabhili waakwe uwa

wumwamu.[§] Akhayibhomba shiniisho ku makha gaala ge akutabhaala ivintu vwonti.

4

Indajilo zya Paulo

¹ Ishi bhanholo bhaani abhaganwa mu lwitikho, in-sambile nhaani kubhalola winza. Imwe mwe luseshelo lwan, khabhili mwe shipambwi sha lufuuyo lwan lwe inhayiposheela ku mbombo yaani. Bhaganwa bhaani, mwimiilile akhinza mu wupeeka wiinyu nu Mwene uYeesu.

² Inkumulamba uEwodiya nu Sintike kuti mwimvwanaje anza bhanholo mwa Mwene uYeesu.

³ Niwe wamwitu umusunde, inkulaabha ubhaavwe abhantanda ibho, kunongwa ye bhanavwizye imbombo iya kulumbiilile iNtumi iNyinza izya Yeesu Kilisiti peeka niine. Bhaamile peeka nu Kilemensi, na bhanji bhaala bhe bhabhombile imbombo peeka niine. Bhonti bhanaabho amataawa gaabho gasimbiilwe mu shitaabu isha wuumi.*

⁴ Museshelaje kubha peeka nu Mwene uYeesu insiku zyonti, khabhili inkuti museshelaje! ⁵ Mulolesyaje uwutonsu wiinyu ku bhantu bhonti, kunongwa ye uMwene uYeesu apalamiye kugalukha. ⁶ Mutayiyimvwaje ku lyolyonti, maulaabhaje uMulungu na kusalifwa, vwe mukwanza vimanyishe kwa Mulungu. ⁷ Wooke uwutengaanu we wukufuma kwa Mulungu we wukushila injeele ya muntu wowonti, wutilindiilile amooyo giinyu ni

§ 3:21 3:21 Bhaazy 1 Bhakolinso 15:42-57. * 4:3 4:3 Amataawa gaabho gasimbiilwe mu shitaabu isha wuumi kwe kuti ishitaabu she uMulungu asimbile amataawa aga Bhakilisiti bhe bhakupuuta izya nalyoli. Bhanaabho bhe bhakhayibha nu wuumi uwa wiila na wiila.

nsiibho zyinyu kunongwa ye mupatinhiine nu Yeesu Kilisiti.

⁸ Bhanholo bhaani mu lwitikho, inkumaliilizya kubhabhuuzya kuti, mulemaje zye zya nalyoli, zye zikupaalwa, izya wugolosu, zye mfinjile, zye zikhondeeye, izya lushindikho, izyi togo, ni zya kupaalwa. ⁹ Muzibhombaje zyonti zye mwamanyiiye na kwitikha kufuma kukwani, zyonti zye mwazyimvwiye inkuzilonga na kulola zye inhabhombaga. Wope umulungu akuutupa uwutengaanu. Uweene atibhe peeka niimwe.

Insalifwo zya Paulo ku Bhafiliipi

¹⁰ Náamile nu useshelo nhaani mwa Mwene uYeesu, we naalola kuti kuwumalilishilo, mwabha na khabhalilo winza akha kunaavwa. Intakuti mwániwiilwe, lyoli mukhankumbukhaga insiku zyonti, ileelo mutámile na khabhalilo akha kulolesya liniilyo. ¹¹ Inkulonga shiniisho te kunongwa ye imbuliliilwe na khantu khamu, lyoli injilubhiziizye kukhobhokha na viila vwe indi navwo. ¹² Imanyile kubhulilwa, na kubha ni vwinji. Injilubhiziizye kukhobhokha ku zyonti, kubha ni vwakulya awe kubha ni nzala, kubha ni vwinji awe kubhulilwa. ¹³ Ingakhola kubhomba zyonti ziniizyo kunongwa ye uKilisiti akumpa amakha. ¹⁴ Poope shiniisho, imwe mwabhombile akhinza, kunongwa ye mukhanavwaga mu khabhalilo khe náamile mu mayimba.

¹⁵ Imwe muBhafiliipi mumanyile muneemwe kuti we inkwanda kulumbiilila iNtumi iNyinza kukwinyu, we nasogola mu nsi iya mu Makedoniya, ishibanza shinyu sheene she shanavwizye. ¹⁶ Poope akhabhalilo khe inhanzaga iwva kunaavwa we indi mu nhaaya iya mu Tesalonike mwándeteeye, kabhili te kheeka kheene, lyoli akhinji bhulo. ¹⁷ Te kuti inkwanza

ku~~posheela~~ kwene ivintu ivinji kukwinyu, lyoli inkwanza mu~~posheele~~ insayo zya Mulungu zye zikufumilana na she mukufumwa. ¹⁸ Imposheleeye ivintu vwonti vwe mwampiye, khabhili vwinji kushila vwe inhanzaga. Ishi indi na vwonti kunongwa ye uEpafuladito ánde-teeye ivintu vwinyu. Ivintu viniivi vwe mufumwizye, vili ngati mfinjile iya kulungulizya ye yikununshila akhinza, imfinjile ye yikwitishilwa na kumukhondezya umulungu. ¹⁹ Ishi umulungu waani atibhasanje kwi dala ilya kubhapa vwonti vwe mubhuliliilwe, ku wudumbwe waakwe uwupiti kwi dala ilya Yeesu Kilisiti. ²⁰ Umulungu, uTaata wiitu, ayimishilwaje, wiila na wiila! Zibhe shiniisho.

Indamukho izya kumalilishizya

²¹ Inkubhalamukha abhafinjile bhonti abha Mulungu bhe bhakumwitikha uYeesu Kilisiti. Abhanholo bhitu mu lwitikho bhe bhali peeka niine ipa bhakubhalamukha. ²² Abhafinjile bhonti abha Mulungu bhe bhali ipa, inhaani bhaala bhe bhali mu nyumba ya Kaisaali, bhakubhalamukha mwentu.

²³ Uwiila wa Mwene uYeesu Kilisiti wubhe peeka niimwe mwentu.

ULufingo uLupwa ku ndongo iya Shimalila
Malila: ULufingo uLupwa ku ndongo iya Shimalila (New
Testament+)

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 13 Jun 2022

3aa8e7a3-f258-5182-ab3f-fbc6f725bb06